

Ni Pangulong
Dieter F. Uchtdorf

Ikaduhang Manuglaygay sa
Unang Pangulohan



Aton Amay, Aton Manunudlo

Nakaagi bala kamo bukas sang isa ka kahon sang (assembly) parts, nagbasa sang instruksyon sa pagbalay, kag nagpanumdum, "Daw Indi man ini maintiendihan"?

Kon kaisa, sa pihak sang aton pinakamaayo nga mga katuyuan kag salig sa kaugalingon, ginakuha naton ang isa ka parte kag nagapamangkot, "Para sa ano ina"? ukon "Paano ina magsanto?"

Ang aton kapaslawan nagadugang samtang ginalantaw naton ang kahon kag makita ang notisya nga nagasiling, "Kinahanglan sang pagbalay—edad 8 pataas." Bangud indi kita sa gihapon makahibalo, wala ini nagapadugang sang aton pagsalig ukon bili-sa-kaugalingon.

Kon kis-a may pareho man kita nga mga eksperiensiya sa ebanghelyo. Samtang ginatulok naton ang pila ka parte sini, mahimo mangalot kita sang aton mga ulo kag matingala kon para sa ano ang ina nga parte. Ukon sa aton pag-usisa sang isa pa gid ka parte, mahimo naton marealisar nga bisan pagkatapos nga magtinguba kita sing todo agud mahangpan sing lubos, indi naton sa gihapon matungkad kon ngaa ang ina nga parte nalakip.

Ang Aton Amay nga Langitnon Aton Manunudlo

Maayo lang, ang aton Amay nga Langitnon naghatag sa aton sang manami nga mga panulin sa pagbalay sang aton mga kabuhi kag sa pagpasad sang pinakamaayo naton nga mga kaugalingon. Ining mga panulin epektibo wala sapayan

sang aton edad ukon kahimtangan. Ginhatagan Niya kita sang ebanghelyo kag sang Simbahan ni Jesucristo. Ginhatagan Niya kita sang plano sang pagtubos, sang plano sang kaluwasan, bisan pa sang plano sang kalipayan. Wala Niya kita ginpabayaan nga nagaisahanon sa pihak sang tanan nga mga kawala'y-kaseguruhan kag mga hangkat sang kabuhi, nga nagasiling, "Ari o. Swertihon ka tani. Diskubreha."

Kon mangin pasensyoso kita kag maglantaw nga may mapainubuson nga tagipusuon kag bukas nga panghuna-huna, makita naton nga ang Dios naghatag sa aton sang madamo nga mga kasangkapan agud mahangpan sing mas maayo ang Iya kumpleto nga mga instruksyon para sa aton kalipayan sa kabuhi.

- Ginhatagan Niya kita sing malahalon nga dulot sang Balaan nga Espiritu, nga may ikasarang nga mangin aton kaugalingon, langitnon nga manunudlo sa pagturon naton sang pulong sang Dios kag pagtinguba nga dalhon ang aton mga huna-huna kag mga buhat nga nagakasanto sa Iya pulong.
- Ginhatagan Niya kita sang wala'y untat (24/7) nga pahnugot sa pagpalapit sa Iya paagi sa mga pangamuyo sang pagtuo kag pag-ampo sing hugot sa tagipusuon.
- Ginhatagan Niya kita sang mga apostoles kag mga propeta sa karon nga panahon, nga nagapahayag sang pulong sang Dios sa aton panahon kag may gahum sa paghugpong ukon pagselyo sa duta kag sa langit.

- Ginpanumbalik Niya ang Iya Simbahan—isa ka organisayon sang mga tumuluo nga nagatrabaho sing ululupod sa pagbulig sa isa kag isa sa ila pagpanikasog sa pagpatuman sang ila kaluwasan nga may kahadlok, kag pagkurog, kag wala'y tupong nga kalipay.¹
- Ginhatagan Niya kita sang balaan nga mga kasulatan—ang Iya sinulat nga pulong para sa aton.
- Ginhatagan Niya kita sang di-maisip nga mga kasang-kapan sang moderno nga teknolohiya agud buligan kita sa aton pagpanglakaton sa pagkedisipulo. Madamo sining manami nga mga kasangkapan masalapuan sa LDS.org.

Ngaa ginhatagan kita sang aton Amay nga Langitnon sang tuman kadamo nga bulig? Tungod palangga Niya kita. Kag tungod, suno sa Iya ginsiling nahanungod sa Iya kaugalingon, “Ini ang akon hilimuon kag himaya—ang magpahanabo sang imortalidad kag wala'y katapusan nga kabuhi sang katawhan.”²

Sa malip-ot nga pulong, ang Amay nga Langitnon amo ang Dios, kag ang Dios manunudlo naton.

Ang aton Amay sa Langit nakahibalo sang kinahanglanon sang Iya mga anak sing mas maayo sangsa kon sin-o pa man. Iya buluhaton kag himaya ang buligan kita sa tanan nga tion, nga nagahatag sa aton sang bilidhon nga dutan-on kag espirituhanon nga mga ikasarang agud buligan kita sa aton pagpanglakaton pabalik sa Iya.

Ang Tagsa ka Amay Isa ka Manunudlo

Sa pila ka mga bahin sang kalibutan, ang mga amay ginapasidungan sang mga pamilya kag sosyedad sa bulan sang Hunyo. Maayo gid pirme nga pasidungan naton kag tahiron ang aton mga ginikanan. Ang mga amay nagahimo sang madamo nga maayo nga mga butang para sa ila mga pamilya kag may madamo nga dalayawon nga mga kinaiya. Ang duha sa pinakaimportante nga papel sang mga amay sa kabuhi sang ila mga anak amo ang mangin maayo nga ehemplio kag isa ka manunudlo. Ang mga amay nagahimo sing sobra pa sangsa maghambal lang sa ila kabataan kon ano ang husto kag sala; sobra pa ang ila

ginahimo sangsa mag-itsa lang sang instruksyon manwal sa ila kag magpaabot nga mahangpan nila ang kabuhi.

Ang mga amay nagatudlo sang ila pinalangga nga mga anak kag nagapakita paagi sa ila maayo nga ehemplio kon paano magpangabuhi sing tampad. Ang mga amay wala nagapabaya sa ila kabataan kundi nagadali-dali sa pagtabang sa ila, nga nagabulig sa pagpabangon sa ila kon sila madasma. Kag kon kis-a kon ginadikta sang kaalam, ang mga amay nagatugot sa ila kabataan nga maghimakas, nga nakahibalo nga ayhan amo ini ang pinakamaayo nga paagi agud sila manuto.

Tanan Kita Mga Manunudlo

Samtang ang mga dutan-on nga amay nagahimo sini para sa ila kaugalingon nga kabataan, ang espiritu sang pagpanudlo isa ka butang nga kinahanglanon naton itanyag sa tanan nga mga anak sang Dios, wala sapayan sang edad, lugar, ukon kahimtangan. Panumduma, ang mga anak sang Dios aton mga utod; kita tanan katapo sang isa lang ka wala'y katubtuban nga pamilya.

Sa sini nga kahulugan, kita tanan mangin mga manunudlo—nga handa magdab-ot kag magbulig sa isa kag isa nga mangin aton pinakamaayo nga kaugalingon. Tungod kita mga anak sang Dios, may ikasarang kita nga mangin pareho sa Iya. Ang pagpalangga sa Dios kag aton isigkatawo, pagtuman sang mga kasuguan sang Dios, kag pag-sunod sang ehemplio ni Cristo amo ang tadlong, makitid, kag malipayon nga banas pabalik sa presensya sang aton langitnon nga mga ginikanan.

Kon ang Dios sang uniberso nagaulikid sing tuman sa aton sa bagay nga isa Sia ka manunudlo sa aton, ayhan kita man makadab-ot sa aton mga isigkatawo, wala sapayan sang ila duag, rasa, kahimtangan sa kabuhi, hinam-balau, ukon relihiyon. Mangin inspirado kita nga mga manunudlo kag bugayan ang mga kabuhi sang iban—indi lang ang iya sang aton mga kabataan kundi ang tanan man nga mga kabataan sang Dios sa bug-os nga kalibutan.

MGA TANDA

1. Tan-awa sa Mga Binuhatan 13:52; Mga Taga-Filipos 2:12.
2. Moses 1:39

PAGTUDLO GIKAN SA SINING MENSAHE

Ayhan luyag ninyo magsugod paagi sa pagpamang-kot sa inyo ginatudloan nga magpanumdum sang isa kation sang ang Amay nga Langitnon nagpanudlo sa ila. Mahimo ninyo dayon sila pangabayon nga magpanum-dum sang mga kaanggid sinang tion kag sang tion nga nabatyagan nila nga gintudloan sila sang ila dutan-on nga amay. Agdaha sila nga isulat ang mga kaanggid sa kon paano sila gintudloan. Mahimo ninyo sila hang-katon nga tilawan ang pagsunod sang butang nga ila ginsulat sa pangpaninguha nga mangin mas maayo nga ehemplio sa iban.

MGA KABATAAN

Bulig sang Amay nga Langitnon

Tungod palangga kita sang Amay nga Langitnon, gin-hatagan Niya kita sang madamo nga mga kasangkapan, ukon mga regalo, agud buligan kita. Ang masunod amo ang pila sa mga regalo nga ginhatac Niya sa aton. Paano mo magamit ining mga regalo sa pagpakamaayo sang imo kabuhi kag agud bugayan ang iban?

gahum sang priesthood

pangamuyo

gugma para sa iban

mga apostoles kag mga propeta

balaan ng mga kasulatan

© 2016 iya sang Intellectual Reserve, Inc. Tanan nga mga kinamatarong ginahuptan. Ginbalhag sa Pilipinas. Petsa sang pagtugot sa Ingles: 6/15. Petsa sang pagtugot sa paglubad: 6/15. Paglubad sang *First Presidency Message, June 2016*. Hiligaynon. 12866 861



Mga Ordinansa kag Mga Kasugtanan sa Templo

Tun-i sing mainampuon ining materyal kag magpangamuyo agud mahibaloan kon ano ang ipaambit. Paano ang paghangop sang “Ang Pamilya: Isa ka Proklamasyon sa Kalibutan” makapadugang sang inyo pagtuo sa Dios kag magabugay sa ila nga inyo ginabantayan paagi sa visiting teaching? Para sa dugang nga impormasyon, mag-log on sa reliefsociety.lds.org.

Pagtuo, Pamilya, Bulig

Ang tanan nga mga ordinansa nga kinahanglanon para sa kaluwasan kag kahitaasan may kau-pod nga mga kasugtanan sa Dios. “Ang paghimo kag pagtipig sang mga kasugtanan nagakahulugan sang pagpili nga ihugpong ang aton mga kaugalingon sa aton Amay nga Langitnon kag kay Jesucristo,” siling ni Linda K. Burton, pangkabilugan nga pangulo sang Relief Society.¹

Si Elder Niel L. Anderson sang Korum sang Napulo’g Duha ka mga Apostoles nagsiling, “Ang Ginuo nagsiling, ‘Sa mga ordinansa . . . ang gahum sang pagkadiosnon makita.’

“May pinasahi nga mga bugay gikan sa Dios sa tagsa ka takos nga tawo nga nabunyagan, nagabaton sang Balaan nga Espiritu, kag pirme nga nagaabit sang sakramento.”²

“Kon ang mga lalaki kag mga babaye nagakadto sa templo,” siling ni Elder M. Russel Ballard sang Korum sang Napulo’g Duha ka mga Apostoles, alangay sila nga ginahatagan sang magkasubong nga gahum, nga amo ang gahum sang priesthood . . .

“. . . Ang tanan nga mga lalaki kag mga babayi may kinamatarong sa sining gahum para magbulig sa ila mga kabuhi. Ang tanan nga naghimo sang sagrado nga mga kasugtanan sa Ginuo kag nagatipig sinang mga

kasugtanan nagakaangay sa pagbaton sang personal nga bugna, mabugayan sang pag-alagad sang mga anghel, mangin malapit sa Dios, magbaton sang kabug-osan sang ebanghelyo, kag sa ulihi, mangin mga manunubli upod ni Jesucristo sang tanan nga iya sang aton Amay.”³

Dugang nga Balaan nga mga Kasulatan

1 Nefi 14:14; Doctrine and Covenants 25:13; 97:8; 109:22

Istorya Gikan sa Matuod-tuod nga Kabuhi

Sang 2007, apat ka adlaw pagkatapos sang isa ka daku nga linog sa Peru, si Elder Marcus B. Nash sang Seventy nakigkita kay branch president Wenceslao Conde kag iya asawa, nga si Pamela. “Si Elder Nash nagpamangkot kay Sister Conde kon kamusta ang iya magagmay nga kabataan. Nga may isa ka yuhum, nagsabat sia nga sa kaayo sang Dios tanan sila luwas kag maayo. Namangkot sia parte sa puluy-an sang mga Conde.

“Wala na ini,’ simple niya nga sabat.

“. . . ‘Pero,’ siling ni Elder Nash, ‘nagayuhum ka samtang kita nagsugilanon.’

“Huo,’ siling niya, ‘Nakapangamuyo na ako kag may katawhayan ako. Yara sa amon ang tanan namon nga kinahanglanon. Yara sa amon ang isa kag isa, yara sa amon ang amon kabataan, nahugpong kami sa templo, yara sa amon ining dala-yawon nga Simbahan, kag yara sa amon ang Ginuo. Makapasad kami liwat sa bulig sang Ginuo.’ . . .

“Ano ang yara sa paghimo kag pagtipig sang mga kasugtanan sa Dios nga nagahatag sa aton sang gahum nga magyuhum sa tunga sang mga kabudlayan, nga bayluhon ang pag-antus sa kadalag-an . . . ?”

“Ang ginalinan amo ang Dios. Ang aton alagyan pakadto sinang gahum amo ang paagi sa aton mga kasugtanan sa Iya.”⁴

MGA TANDA

1. Linda K. Burton, “The Power, Joy, and Love of Covenant Keeping,” *Liahona*, Nob. 2013, 111.
2. Neil L. Andersen, “Power in the Priesthood,” *Liahona*, Nob. 2013, 92.
3. M. Russell Ballard, “Men and Women in the Work of the Lord,” *Liahona*, Abr. 2014, 48-49.
4. Tanawa sa D. Todd Christofferson, “The Power of Covenants,” *Liahona*, Mayo 2009, 19, 20-21.

Binagbinaga Ini

Paano ang mga ordinansa kag mga kasugtanan sa templo nagapabakod kag nagahatag sang gahum sa aton?